

四庫全書

子部

欽定四庫全書

子部
稗編卷八

詳校官中書臣費鏌

主事臣祁韻士覆勘

總校官中書臣朱鈐

校對官檢討臣郭寅

謄錄監生臣許祖懷

欽定四庫全書

裨編卷八

明 唐順之 撰

詩一

詩大序

卜 商

詩者志之所之也在心為志發言為詩情動于中而形于言言之不足故嗟歎之嗟歎之不足故詠歌之詠歌之不足不知手之舞之足之蹈之也情發于聲聲成文謂之音治世之音安以樂其政和亂世之音怨以怒其

政乖亡國之音哀以思其民困故正得失動天地感鬼神莫近於詩先王以是經夫婦成孝敬厚人倫美教化移風俗故詩有六義焉一曰風二曰賦三曰比四曰興五曰雅六曰頌上以風化下下以風刺上主文而譎諫言之者無罪聞之者足以戒故曰風至于王道衰禮義廢政教失國異政家殊俗而變風變雅作矣國史明乎得失之迹傷人倫之變哀刑政之苛吟詠性情以風其上達于事變而懷其舊俗者也故變風發乎情止乎禮

義發乎情民之性也止乎禮義先王之澤也是以一國之事繫一人之本謂之風言天下之事形四方之風謂之雅雅者正也言王政之所由廢興也政有小大故有小雅焉有大雅焉頌者美盛德之形容以其成功告于神明者也是謂四始詩之至也

詩序辯

朱熹

詩序之作說者不同或以為孔子或以為子夏或以為國史皆無明文可考惟後漢書儒林傳以為衛宏作毛

詩序今傳于世則序乃宏作明矣然鄭氏又以為諸序本自合為一編毛公始分以寘諸篇之首則是毛公之前其傳已久宏特增廣而潤色之耳故近世諸儒多以序之首句為毛公所分而其下推說云云者為後人所益理或有之但今考其首句則已有不得詩人之本意而肆為妄說者矣况沿襲云云之誤哉然計其初猶必自謂出於臆度之私非經本文故且自為一編別附經後又以尚有齊魯韓氏之說並傳于世故讀者亦有以

知其出于後人之手不盡信也及至毛公引以入經乃不綴篇後而超冠篇端不為注文而直作經字不為疑辭而為決辭其後三家之傳又絕而毛說孤行則其牴牾之迹無復可見故此序者遂若詩人先所命題而詩文反為因序以作于是讀者轉相尊信無敢擬議至于有所不通則必為之委曲遷就穿鑿而附合之寧使經之本文繚戾破碎不成文理而終不忍明以小序為出于漢儒也愚之病此久矣然猶以其所從來也遠其間

容或真有傳授證驗而不可廢者故既頗采以附傳中而復并為一編以還其舊因以論其得失云

大序國史明乎得失之迹傷人倫之變哀刑政之苛吟詠情性以風其上達于事變而懷其舊俗者也

詩之作或出于公卿大夫或出于匹夫匹婦蓋非一人而序以為專出於國史則誤矣說者欲蓋其失乃云國史紬繹詩人之情性而歌詠之以風其上則不惟文理不通而攷之周禮太史之屬掌書而不掌詩其誦詩以

諫乃太師之屬瞽矇之職也故春秋傳曰史為書瞽為詩說者之云兩失之矣

小序是以關雎樂得淑女以配君子憂在進賢不淫其色哀窈窕思賢才而無傷善之心焉是關雎之義也

按論語孔子嘗言關雎樂而不淫哀而不傷蓋淫者樂之過傷者哀之過獨為是詩者得其情性之正是以哀樂中節而不至于過耳而序者乃析哀樂淫傷各為一

事而不相須則已失其旨矣至于傷為傷善之心則又大失其旨而全無文理也或曰先儒多以周道衰詩人本諸衽席而關雎作故揚雄以周康之時關雎作為傷始亂杜欽亦曰佩玉晏鳴關雎歎之說者以為古者后夫人鷄鳴佩玉去君所周康后不然故詩人歎而傷之此魯詩說也與毛異矣但以哀而不傷之意推之恐其有此理也曰此不可知矣但儀禮以關雎為鄉樂又為房中之樂則是周公制作之時已有此詩矣若如魯說

則儀禮不得為周公之書儀禮不為周公之書則周之
盛時乃無鄉射燕飲房中之樂而必有待乎後世之刺
詩也其不然也明矣且為人子孫乃無故而播其先祖
之失於天下如此而尚可以為風化之首乎

騶虞鵲巢之應也鵲巢之化行人倫既正朝廷既治
天下純被文王之化則庶類蕃殖蒐田以時仁如騶
虞則王道成也

此序得詩之大指然語意亦不分明楊氏曰二南正始

之道王化之基蓋一體也王者諸侯之風相須以為治諸侯所以代其終也故召南之終至于仁如騶虞然後王道成焉夫王道成非諸侯之事也然非諸侯有騶虞之德亦何以見王道之成哉歐陽公曰賈誼新書曰騶者文王之囿名虞者囿之司獸也陳氏曰禮記射義云天子以騶虞為節樂官備也則其為虞官明矣獵以虞為主其實歎文王之仁而不斥言也此與舊說不同今存于此

柏舟言仁而不遇也衛頃公之時仁人不遇小人在側

詩之文意事類可以思而得其時世名氏則不可以強而推故凡小序惟詩文明白直指其事如甘棠定中南山株林之屬若證驗的切見于書史如載馳碩人清人黃鳥之類決為可無疑者其次則詞旨大槩可知必為某事而不可知其為某時某人者尚多有之若為小序者姑以其意推尋探索依約而言則雖有所不知亦

不害其為不自欺雖有未當人亦當恕其所不及今乃不然不知其時者必強以為某王某公之時不知其人者必強以為某甲某乙之事于是傳會書史依託名謚鑿空妄語以誑後人其所以然者特以恥其有所不知而惟恐人之不見信而已且如柏舟不知其出于婦人而以為男子不知其不得于夫而以為不遇于君此則失矣然有所不及而不自欺則亦未至于大害理也今乃斷然以為衛頃公之時則其故為欺罔以誤後人之

罪不可揜矣蓋其偶見此詩冠于三衛變風之首是以
求之春秋之前而史記所書莊宣以上衛之諸君事皆
無可攷者謚亦無甚惡者獨頃公有賂王請命之事其
謚又為甄心動懼之名如漢諸侯王必其嘗以罪謫然
後加以此謚以此意其必有棄賢用佞之失而遂以此
詩予之若將以銜其多知而必于取信不知將有明者
從旁觀之則適所以暴其真不知而啓其深不信也凡
小序之失以此推之什得八九矣又其為說必使詩無

一篇不為美刺時君國政而作固已不切於情性之自然而又拘於時世之先後其或書傳所載當此之時偶無賢君美謚則雖有辭之美者亦例以為陳古而刺今是使讀者疑于當時之人絕無善則稱君過則稱已之意而一不得志則扼腕切齒嘻笑冷語以懟其上者所在而成羣是其輕躁險薄尤有害于溫柔敦厚之教故予不可以不辯

桑中刺奔也衛之公室淫亂男女相奔至于世族在

位相竊妻妾期于幽遠政散民流而不可止

此詩乃淫奔者所自作序之首句以為刺奔誤矣其下云云者乃復得之樂記之說已畧見本篇矣而或者以為刺詩之體固有鋪陳其事不加一辭而閔惜懲創之意自見于言外者此類是也豈必譙讓質責然後為刺也哉此說不然夫詩之為刺固有不加一辭而意自見者清人猗嗟之屬是已然嘗試玩之則其賦之之人猶在所賦之外而詞意之間猶有賓主之分也豈有將欲

刺人之惡乃反自為彼人之言以陷其身於所刺之中而不自知也哉其必不然也明矣又況此等之人安于為惡其于此等之詩計其平日固已自其口出而無慚矣又何待吾之鋪陳而後始知其所為之如此亦豈畏吾之閔惜而遂幡然遽有懲創之心耶以是為刺不惟無益殆恐不免於鼓之舞之而反以勸其惡也或者又曰詩三百篇皆雅樂也祭祀朝聘之所用也桑間濮上之音鄭衛之樂也世俗之所用也雅鄭不同部其來尚

矣且夫子答顏淵之問於鄭聲亟欲放而絕之豈其刪
詩乃錄淫奔者之詞而使之合奏於雅樂之中乎亦不
然也雅者二雅是也鄭者緇衣以下二十一篇是也衛
者邶鄘衛三十九篇是也桑間衛之一篇桑中之詩是
也二南雅頌祭祀朝聘之所用也鄭衛桑濮里巷狎邪
之所歌也夫子之於鄭衛蓋深絕其聲於樂以為法而嚴
立其詞于詩以為戒如聖人固不語亂而春秋所記無
非亂臣賊子之事蓋不如是無以見當時風俗事變之

實而垂鑒戒于後世固不得已而存之所謂道並行而不相悖者也今不察此乃欲為之諱其鄭衛桑濮之實而文之以雅樂之名又欲從而奏之宗廟之中朝廷之上則未知其將以薦之何等之鬼神用之何等之賓客而於聖人為邦之法又豈不為陽守而陰叛之耶其亦誤矣曰然則大序所謂止乎禮義夫子所謂思無邪者又何謂耶曰大序指柏舟綠衣泉水竹竿之屬而言以為多出于此耳非謂篇篇皆然而桑中之類亦止乎禮

義也夫子之言正為人有邪正美惡之雜故特言此以明其皆可懲惡勸善而使人得其性情之正耳非以桑中之詩亦以無邪之思作之也曰荀卿所謂詩者中聲之所止太史公亦謂三百篇者夫子皆絃歌之以求合于韶武之音何耶曰荀卿之言固為正經而發若史遷之說則恐亦未足為據也豈有哇淫之曲而可以強合於韶武之音也耶

考槃刺莊公也不能繼先公之業使賢者退而窮處

此為美賢者窮處而能安其樂之詩文意甚明然詩文
未有見棄于君之意則亦不得為刺莊公矣序蓋失之
而未有害于義也至于鄭氏遂有誓不忘君之惡誓不
過君之朝誓不告君以善之說則其害義又有甚焉于
是程子易其訓詁以為陳其不能忘君之意陳其不得
過君之朝陳其不得告君以善則其意忠厚而和平矣
然未知鄭氏之失生于序文之誤若但直據詩詞則與
其君初不相涉也

有女同車刺忽也鄭人刺忽之不昏於齊太子忽嘗
有功于齊齊侯請妻之齊女賢而不取卒以無大國
之助至于見逐故國人刺之

按春秋傳齊侯欲以文姜妻鄭太子忽忽辭人問其故
忽曰人各有耦齊大非吾耦也詩曰自求多福在我而
已大國何為其後北戎侵齊鄭伯使忽帥師救之敗戎
師齊侯又請妻之忽曰無事于齊吾猶不敢今以君命
奔齊之急而受室以歸是以師昏也民其謂我何遂辭

諸鄭伯祭仲謂忽曰君多內寵子無大援將不立忽又不聽及即位遂為祭仲所逐此序文所據以為說者也然以今考之此詩未必為忽而作序者但見孟姜二字遂指以為齊女而附之于忽耳假如其說則忽之辭昏未為不正而可刺至其失國則又特以勢孤援寡不能自定亦未有可刺之罪也序乃以為國人作詩以刺之其亦誤矣後之讀者又襲其誤必欲煅煉羅織文致其罪而不肯赦徒欲以徇說詩者之謬而不知其失是非

之正害義理之公以亂聖經之本指而壞學者之心術
故予不可以不辯

狡童刺忽也不能與賢人圖事權臣擅命也

昭公嘗為鄭國之君而不幸失國非有大惡使其民疾
之如寇讐也況方刺其不能與賢人圖事權臣擅命則
是公猶在位也豈可忘其君臣之分而遽以狡童目之
耶且昭公之為人柔懦踈闊不可謂狡即位之時年已
壯大不可謂童以是名之殊不相似而序于山有扶蘇

所謂狡童者方指昭公之所美至于此篇則遂移以指公之身焉則其舛又甚而非詩之本指明矣大抵序者之于鄭詩凡不得其說者則舉而歸之于忽文義一失而其害於義理有不可勝言者一則使昭公無辜而被謗二則使詩人脫其淫謔之實罪而麗于訕上悖理之虛惡三則厚誣聖人刪述之意以為實賤昭公之守正而深與詩人之無禮于其君凡此皆非小失而後之說者猶或主之其論愈精其害愈甚學者不可以不察也

無衣美晉武公也武公始并晉國其大夫為之請命
乎天子之使而作是詩也

序以史記為文詳見本篇但此詩若非武公自作以述
其賂王請命之意則詩人所作以著其事而陰刺之耳
序乃以為美之失其旨矣且武公弑君篡國大逆不道
乃王法之所必誅而不赦者雖曰尚知王命之重而能
請之以自安是亦禦人于白晝大都之中而自知其罪
之甚重則分薄賊餌貪吏以求私有其重寶而免於刑

戮是乃猾賊之尤耳以是為美吾恐其獎姦誨盜而非
所以為教也小序之陋固多然其顛倒順逆亂倫悖理
未有如此之甚者故予特深辯之以正人心以誅賊黨
意庶幾乎大序所謂正得失者而因以自附于春秋之
義云

大雅文王文王受命作周也

受命受天命也作周造周室也文王之德上當天心下
為天下所歸往三分天下而有其二則已受命而作周

矣武王繼之遂有天下亦卒文王之功而已然漢儒惑於讖緯始有赤雀丹書之說又謂文王因此遂稱王而改元殊不知所謂天之所以為天者理而已矣理之所在衆人之心而已矣衆人之心是非向背若出於一而無一毫私意雜于其間則是理之自然而天之所以為天者不外是矣今天下之心既以文王為歸矣則天命將安往哉書所謂天視自我民視天聽自我民聽所謂天聰明自我民聰明天明畏自我民明畏皆謂此耳豈

金定四庫全書
卷八
必赤雀丹書而稱王改元哉稱王改元之說歐陽公蘇氏游氏辯之已詳去此而論則此序本亦得詩之大旨而于其曲折之意有所未盡已論于本篇矣

抑衛武公刺厲王亦以自警也

此詩之序有得有失蓋其本例以為非美非刺則詩無所為而作又見此詩之次適出于宣王之前故直以為刺厲王之詩又以國語有左史之言故又以為亦以自警以詩考之則其曰刺厲王者失之而曰自警者得之

也夫曰刺厲王之所以為失者史記衛武公即位于宣王之三十六年不與厲王同時一也詩以小子目其君而爾汝之無人臣之禮與其所謂敬威儀慎出話者自相背戾二也厲王無道貪虐為甚詩不以此箴其膏肓而徒以威儀詞令為諄切之戒緩急失宜三也詩詞倨慢雖仁厚之君有所不能容者厲王之暴何以堪之四也或以史記之年不合而以為追刺者則詩所謂聽用我謀庶無大悔非所以望于既往之人五也曰自警之

所以為得者國語左史之言一也詩曰謹爾侯度二也
又曰聿喪厥國三也又曰亦聿既耄四也詩意所指與
淇澳所美賓筵所悔相表裏五也二說之得失其佐驗
明白如此必去其失而取其得然後此詩之義明今序
者乃欲合而一之則其失者固已失之而其得者亦未
足為全得也然此猶自其詩之外而言之也若但即其
詩之本文而各以其一說反覆讀之則其訓義之顯晦
疎密意味之厚薄淺深可以不待攷證而判然于胷中

矣此又讀詩之簡要直訣學者不可以不知也

昊天有成命郊祀天地也

此詩詳攷經文而以國語證之其為康王以後祀成王之詩無疑而毛鄭舊說定以頌為成王之時周公所作故凡頌中有成王及成康字者例皆曲為之說以附己意其迂滯僻澁不成文理甚不難見而古今諸儒無有覺其謬者獨歐陽公著時世論以斥之其辯明矣然讀者扭於舊聞亦未遽肯深信也小序又以此詩篇首有

昊天二字遂定以為郊祀天地之詩諸儒往往亦襲其
誤殊不知其首言天命者止于一句次言文武受之者
亦止一句至于成王以下然後詳說不敢康寧緝熙安
靜之意乃至五句而後已則其不為祀天地而為祀成
王無可疑者又況古昔聖王制為祭祀之禮必以象類
故祀天于南祭地于北而其壇壝樂舞器幣之屬亦各
不同若曰合祭天地于圜丘則古者未嘗有此瀆亂龐
雜之禮若曰一詩而兩用如所謂冬薦魚春獻鮓者則

此詩專言天而不及地若於澤中方丘奏之則于義何
所取乎序說之云反覆推之皆有不通其謬無可疑者
故今特上據國語旁采歐陽以定其說庶幾有以不失
此詩之本旨耳或曰國語所謂始于德讓中于信寬終
于固和故曰成者其語成字不為王誦之謚而韋昭之
注大畧亦如毛鄭之說矣此又何耶曰叔向蓋言成王
之所以為成以是三者正猶子思所謂文王之所以為
文班固所謂尊號曰昭不亦宜乎者耳韋昭何以知其

必謂文武以是成其王道而不為王誦之謚乎蓋其為
說本出毛鄭而不悟其非者今欲一滌千古之謬而不
免乎以誤而證誤則亦將何時而已耶或者又曰蘇氏
最為不信小序而于此詩無異詞且又以為周公制作
所定後王不容復有改易成王非創業之主不應得以
基命稱之此又何耶曰蘇氏之不信小序固未嘗見其
不可信之實也夫周公制作亦及其當時之事而止耳
若乃後王之廟所奏之樂自當隨時附益若商之玄鳥

作于武丁孫子之世漢之廟樂亦隨時而更定焉豈有
周公之後王乃獨不得褒顯其先王之功德而必以改
周公為嫌耶基者非必造之於始亦承之於下之謂也
如曰邦家之基豈必謂太王王季之臣乎以是為說亦
不得而通矣况蘇氏所以為此實未能忘北郊集議之
餘忽今固不得而取也

燕魯齊詩傳畧

燕韓嬰作內外傳數萬言頗與齊魯間殊然歸一也

漢藝文志韓故三十六卷內傳四卷外傳六卷說四十
一卷隋經籍志韓詩二十二卷薛氏章句韓詩翼要十
卷漢侯芭撰梁有韓詩譜一卷唐藝文志韓詩卜商序
韓嬰注二十二卷又外傳十卷

關雎 詩人言雎鳩貞潔慎匹以聲相求隱蔽乎無人
之處故人君退朝入于私宮后妃御見去留有度應
門擊柝鼓人上堂退反宴處體安志明今時大人內
傾于色賢人見其萌故詠關雎說淑女正容儀以刺

時

薛君章句

後漢書明帝詔應門失守關雎刺世

宋均曰應門聽政之處也言不以政事為務有宣

淫之心關雎樂而不淫思得賢人與之共化修應門之政者也

又馮衍傳注薛夫子章句曰雎鳩貞潔

云云

窈窕貞專貌淑女奉順坤德成其綱紀

卷耳

頃筐欽筐也金罍大夫器也天子以玉諸侯大

夫皆以金士以梓一升曰爵爵盡也足也二升曰觚

觚寡也飲當寡少三升曰觶觶適也飲當自適也四

升曰角角觸也不能自適觸罪過也五升曰散散訕

也飲不自節為人所謗訕也總名曰爵其實曰觴觴者餉也觥亦五升所以罰不敬觥廓也所以著明之貌君子有過廓然著明非所以餉不得觴

韓詩說正義又儀禮

疏

茱萸 傷夫有惡疾也直曰車前瞿曰茱萸茱萸木名

實似李茱萸澤瀉也茱萸臭惡之菜詩人傷其君子

有惡疾人道不通

闕

不得發憤而作以興茱萸雖

為惡菜我猶采采而不已以興君子雖有惡疾我猶

守而不離去

騶虞 天子掌鳥獸官

柏舟 衛宣姜自警所作

燕燕 衛定姜歸其娣送之而作

蝦蟇 刺淫奔女也詩人言蝦蟇在東者邪色乘陽人

君淫佚之徵臣子為君父隱藏故言莫之敢指乃如

之人兮

黍離 伯封作也闕 離離黍貌也詩人求亡不得

不識于物視彼黍離離然憂甚之時反以為稷之苗

乃自知憂之甚也昔尹吉甫信後妻闕而殺孝子

伯奇其弟伯封求而不得作黍離之詩

猗嗟舞則纂兮言其舞則應雅樂也薛君章句
文選注四矢

變兮變易也釋文

伐檀順流而風曰淪何謂素餐兮素者質也人但有

質朴而無治民之材名曰素餐尸祿者頗有所知善

惡不言默然不語苟欲得祿而已譬如尸焉薛君章
句文選

注

蟋蟀 歲聿其莫聿辭也莫晚也言君之年歲已晚也

薛君章句

文選注

匪風 匪車揭兮中心惻兮說曰是非古之風也發發

者是非古之車也揭揭者蓋傷之也

漢書王吉傳
吉學韓詩

鷦鷯 鷦鷯鳥名也鷽鷽所以愛養子者適以病之愛

憐養其子者謂堅固其窠窠病之者謂不知托于大

樹茂枝反敷之葦蒿風至蒿折巢覆有子則死有卵

則破是其病也

文選注

湛露

惜惜夜飲

說文作慇

惜惜和悅之貌夫飲之禮不脫

屢而即序者謂之禮疏而上坐者謂之宴能飲者飲

之不能飲者已謂之醕齊顏色均衆寡謂之沉閉門

不出者謂之酒故君子可以宴可以醕不可以沉不

可以酒

鼓鐘

昭王之時作

正義鄭于中侯握何紀注云昭王之時鼓鐘之詩所為作者依三為

說也南夷之樂曰南四夷之樂唯南可以和不于雅者以

其人聲音及籥不僭差也

後漢書注薛君云

王者舜六代之

樂四夷之樂大德廣被之所及

內傳文選注

生民 三王各正其郊

轉說禮記正義

姜姓原字

韓詩章句史記注

聖人皆無父感天而生

異義韓魯韓說正義

惟辭也

抑 侯包云衛武公刺王室亦以自戒

天作 彼徂矣岐有夷之行徂往也夷易也行道也彼

百姓歸文王者皆曰岐周有易道可往歸矣易道謂

仁義之道而易行故岐道阻險而人不難

振鷺 西雍文王之雍也言文王之時辟雍學士皆潔

白之人也

薛君章句
後漢書注

商頌 美襄公

史記宋世家襄公之時修仁行義欲與盟會其大夫正考甫美之追道契湯高

宗殷所以興作商頌
注韓詩章句美襄公

魯申培始為詩傳號魯詩漢志魯故二十五卷說二十
八卷隋志魯詩亡于西晉而小學有一字石經魯詩六

卷

佩玉晏鳴關雎歎之

漢書杜欽傳 李奇曰 后夫人鷄鳴佩玉去君所 周康王后不然故

詩人歎而傷之臣
贊曰此魯詩也

先君之思以畜寡人此衛夫人定姜之詩也定姜無子
立庶子伋是為獻公畜孝也獻公無禮于定姜定姜
作詩言獻公當思先君定公以孝于寡人

齊轅固為傳漢志齊后氏故二十卷傳三十九卷孫氏
故二十七卷傳二十八卷雜記十八卷隋志齊詩魏代
已亡

衛宣公之子壽閔其兄伋之且見害作憂思之詩黍離

之詩是也

洪邁容齋四筆齊詩以為云云按晁氏詩序論齊魯韓三家以正風為魯詩

騶虞為天子掌鳥獸官齊詩

章句

五際

考索

翼奉初學齊詩聞五際之要十月之交篇知日食地震之效昭然可明猶巢居知風穴居知雨鄭作六藝論引汎歷樞云午亥之際為革命卯酉為改正辰在天門出入候聽卯天保也酉祈父也午采芑也亥大明也亥為革命一際也辰為天門出入候聽二際也卯為陰陽

交際三際也午為陽謝陰興四際也酉為陰盛陽微五
際也其詩含此五際其內傳曰五際卯酉午戌亥也陰
陽終始際會之歲于此則有變改之政也詩有五際推
得失攷天心以言王道之安危

四家詩

鄭樵

齊魯燕趙四詩土音不同訓詁亦異故孔穎達曰三家
之詩字與毛公異者動以百數及證之他書三家之學
非徒字異亦併與文義俱異矣當武帝時毛詩始出自

以源流出于子夏其書貫穿先秦古書惟河間獻王好古博見異書深知其精時齊魯韓三家皆列于學官獨毛氏不得立中興後謝曼卿衛宏賈逵馬融鄭康成之徒皆宗毛公學者翕然稱之今觀其書所釋鳩鴉與金縢合釋北山烝民與孟子合釋昊天有成命與國語合釋碩人清人皇矣黃鳥與左氏合而序由庚六篇與儀禮合當毛公之時左氏傳未出孟子國語儀禮未甚行而毛氏之說先與之合不謂之源流子夏可乎漢興三家

盛行毛最後出世人未知毛氏之密其說多從齊魯
韓氏逮至魏晉有左氏國語孟子諸書證之然後學
者捨三家而從毛氏故齊詩亡于魏魯詩亡于晉韓
詩雖存無傳之者五十篇今但存其
外傳十篇而已從韓氏之說則
二南商頌皆非治世音以二南作于周衰以次
商頌作于宋襄公之世從毛
氏之說則禮記左氏無往而不合此所以毛詩獨存
于世也

詩譜序

歐陽脩後同

兩朝國史志歐陽修於絳州得注本卷首殘闕因補成進之而不知注者為太叔求也

毛鄭于詩其學亦已博矣予嘗依其箋傳考之于經而證以序譜惜其不合者頗多蓋詩述商周自生民玄鳥上陳稷契下迄陳靈公千五六百歲之間旁及列國君臣世次國地山川封域圖牒鳥獸草木魚蟲之名與其風俗善惡方言訓詁盛衰治亂美刺之由無所不載然則孰能無失于其間哉予疑毛鄭之失既多然不敢輕

為改易者意其為說不止于箋傳而已恨不得盡見二
家之書未能徧通其旨夫不盡見其書而欲折其是非
猶不盡人之辭而欲斷其訟之曲直其能果于自決乎
其能使之必服乎世傳鄭氏詩譜最詳求之久矣不可
得雖崇文總目秘書所藏亦無之慶厯四年奉使河東
至于絳州偶得焉其文有注而不見名氏然首尾殘缺
自周公致太平以上皆亡之其國譜旁行尤易為訛舛
悉皆顛倒錯亂不可復攷凡詩雅頌兼列商魯其正變

之風十有四國而其次皆莫詳其義惟封國變風之先後不可以不知周召王豳同出于周邶鄘并于衛檜魏無世家其可攷者陳齊衛晉曹鄭秦此封國之先後也豳齊衛檜陳唐秦鄭魏曹此變風之先後也周南召南邶鄘衛王鄭齊豳秦魏唐陳曹此孔子未刪詩之前周太師樂歌之次第也周召邶鄘衛王檜鄭齊魏唐秦陳曹豳此鄭氏詩譜次第也黜檜後陳此今詩次第也初予未見鄭譜嘗略攷春秋史記本紀世家年表而合以

毛鄭之說為詩圖十四篇今因取以補鄭譜之亡者足以見二家所說世次先後甚備因據而求其得失較然矣而仍存其圖庶幾以見予于鄭氏之學盡心焉耳夫盡其說而有所不通然後得以論正予豈好為異論者哉凡補其譜十有五補其文字二百七增損塗乙改正者三百八十三而鄭氏之譜復完

王國風解

六經之法所以法不法正不正由不法與不正然後聖

人者出而六經之書作焉周之衰也始之以夷懿終之以平桓平桓而後不復支矣故書止文侯之命而不復錄春秋起周平之年而治其事詩自黍離之什而降於風絕于文侯之命謂教令不足行也起于周平之年謂正朔不足加也降于黍離之什謂雅頌不足興也教令不行天下無王矣正朔不加禮樂偏出矣雅頌不興王者之迹息矣詩書貶其失春秋憫其微無異焉爾然則詩處于衛後而不次于二南惡其近于正而不明也其

體不加周姓而存王號嫌其混于諸侯而無王也近正則貶之不著矣無王則絕之太遽矣不著云者周召二南至正之詩也次于至正之詩是不得貶其微弱而無異二南之詩爾若然豈降之乎太遽云者春秋之法書王以加正月言王人雖微必尊于上周室雖弱不絕其王苟絕而不與其尊周乎故曰王號之存黜諸侯也次衛之下別正變也桓王而後雖欲其正風不可得也詩不降于厲幽之年亦猶春秋之作不在惠公之世爾春

秋之作傷典誥之絕也黍離之降憫雅頌之不復也幽平而後有如宣王者出則禮樂征伐不在諸侯而雅頌未可知奈何推波助瀾縱風止燎乎

幽問

或問七月幽風也而鄭氏分為雅頌其詩八章以其一章二章為風三章四章五章六章之半為雅又以六章之半七章八章為頌一篇之詩別為三體而一章之言半為雅而半為頌詩人之意果若是乎應之曰七月周

公之作也其言豳土寒暑氣節農桑之候勤生事男女耕織衣食之本以見太王居豳興起王業艱難之事此詩之本義毛鄭得之矣其為風為雅為頌吾所不知也所謂七月之本義幸在者吾既得之矣其有所難知者闕之可也雖然吾知鄭氏之說自相牴牾者矣今詩之經毛鄭所學之經也經以為風而鄭氏以為雅頌豈不戾哉夫一國之事謂之風天下之政謂之雅以其成功告于神明謂之頌此毛鄭之說也然則風諸侯之事雅

天子之事今所謂七月者謂之風可矣謂之雅頌則非
天子之事又非告功於神明者此又其戾者也風雅頌
之為名未必然則於其所自為說有不能通也問者又
曰鄭氏所以分為雅頌者豈非以周禮籥章之職有吹
豳詩雅頌之說乎應之曰今之所謂周禮者不完之書
也其禮樂制度蓋有周之大法焉至其攷之于事則繁
雜而難行者多故自漢興六經復出而周禮獨不為諸
儒所取至以為黷亂不驗之書獨鄭氏尤推尊之宜其

分豳之風為雅頌以合其事也問者又曰今豳詩七篇自鴟鴞以下六篇皆非豳事獨七月一篇豈足以自為一國之風然則七月而下七篇寓于豳風耳豳其自有詩乎周禮所謂豳雅豳頌者豈不為七月而自有豳詩而今亡者乎至於七月亦嘗亡矣故齊魯韓三家之詩皆無之由是言之豳詩其猶有亡者乎應之曰經有其文猶有不可知者經無其事吾可逆意而為然乎

十五國次解

國風之號起周終豳皆有所次聖人豈徒云哉而明詩者多泥于數說而不通或者又以為聖人之意不在於先後之次是皆不足為訓法者大抵國風之次以兩而合之分其次以為比則賢善者著而醜惡者明矣或曰何如其謂之比乎曰周召以淺深比也衛王以世爵比也鄭齊以族氏比也魏唐以土地比也秦陳以祖裔比也檜曹以美惡比也豳能終之以正故居末焉淺深云者周得之深故先于召世爵云者衛為紂都而紂不能

有之周幽東遷無異是也加衛于先明幽紂之惡同而
不得近于正焉姓族云者周法尊其同姓而異姓者為
後鄭先于齊其理然也土地云者魏本舜地唐為堯封
以舜先堯明晉之亂非魏褊儉之等也祖裔云者陳不
能興舜而襄公能大于秦子孫之功陳不如矣穆姜卜
而遇艮之隨乃引文言之辭以為卦說夫穆姜始筮時
去孔子之生尚十四年爾是文言先于孔子而有乎不
然左氏不為誕妄也推此以迹其怪則季札觀樂之次

明白可驗而不足為疑矣夫黍離以下皆平王東遷桓王失位之詩是以列于國風言其不足正也借使周天子至甚無道則周之樂工敢以周王之詩降同諸侯乎是皆不近人情不可為法者昔孔子大聖人其作春秋也既微其辭然猶不公傳于人弟子口授而已況一樂工而敢明白彰顯其君之惡哉此又可驗孔子分定為信也本其事而推之以著其妄庶不為無據云

定風雅頌解

詩之息久矣天子諸侯莫得而自正也古詩之作有天下焉有一國焉有神明焉觀天下而成者人不得而私也體一國而成者衆不得而違也會神明而成者物不得而欺也不私焉雅著矣不違焉風一矣不欺焉頌明矣然則風生于文王而雅頌雜于武王之間風之變自夷懿始雅之變自厲幽始霸者興變風息焉王道廢詩不作焉秦漢而後何其滅然也王通謂諸侯不貢詩天子不采風樂官不達雅頌國史不明變非民之不作也

詩出於民之情性情性其能無哉職詩者之罪也通之言其幾于聖人之心矣或問成王周公之際風有變乎曰幽是矣幸而成王悟也不然則變而不能復乎幽之去雅一息焉蓋周公之心也故能終之以正

魯頌解

或問諸侯無正風而魯有頌何也曰非頌也不得已而名之也四篇之體不免變風之例爾何頌乎頌惟一章而魯頌章句不等頌無頌字之號而今四篇皆有其序

曰李孫行父請命于周而史克作之亦未離乎疆也頌之本一人是之未可作焉訪于衆人衆人可之猶曰天下有非之者又訪于天下天下人亦曰可然後作之無疑矣僖公之政國人猶未全其惠而春秋之貶尚不能逃未知其頌何從而興乎頌之美者不過文武文武之頌非當其存而作者也皆追述也僖公之德孰與文武而曰有頌乎先儒謂名生于不足宜矣然聖人所以列為頌者其說有二貶魯之疆一也勸諸侯之不及二也

請于天子其非彊乎特取于魯其非勸乎或曰何謂勸
曰僖公之善不過復土宇修宮室大牧養之法爾聖人
猶不敢遺之使當時諸侯有過於僖公之善者聖人忍
絕去而不存之乎故曰勸爾而鄭氏謂之備三頌何哉
大抵不列於風而與其為頌者所謂憫周之失貶魯之
強是矣豈鄭氏之云乎

魯問

或問魯詩之頌僖公盛矣信乎其克淮夷伐戎狄服荆

舒荒徐宅至于海邦蠻貊莫不從命何其盛也泮水曰
既作泮宮淮夷攸服矯矯虎臣在泮獻馘又曰既克淮
夷孔淑不逆又曰憬彼淮夷來獻其琛闕宮曰戎狄是
膺荆舒是懲又曰淮夷來同魯侯之功又曰遂荒徐宅
至于海邦淮夷蠻貊及彼南夷莫不率從其武功之盛
威德所加如詩所陳五霸不及也然魯在春秋時常為
弱國其與諸侯會盟征伐見于春秋史記者可數也皆
無詩文所頌之事而淮夷戎狄荆舒徐人之事有見於

春秋者又皆與頌不合者何也按春秋僖公在位三十三年其伐邾者四敗莒滅項者各一此魯自用兵也其四年伐楚侵陳六年伐鄭是時齊桓公方稱霸主兵率諸侯之師而魯亦與焉耳二十八年圍許是時晉文公方稱伯主兵率諸侯而魯亦與焉耳十五年楚伐徐魯救徐而徐敗十八年宋伐齊魯救齊而齊敗二十六年齊人侵伐魯鄙魯乞師于楚楚為伐齊取穀春秋所記僖公之兵止于是矣其自主兵所伐邾莒項皆小國雖

能滅項反見執于齊其所伐大國皆齊晉主兵其有所
救者又力不能勝而輒敗由是言之魯非強國可知也
焉有詩人所頌威武之功乎其所侵伐小國春秋必書
焉有所謂克服淮夷之事乎惟其十六年一會齊侯于
淮爾是會也淮夷侵鄆齊侯來會謀救鄆爾由是言之
淮夷未嘗服于魯也其曰戎狄是膺荆舒是懲者鄭氏
以謂僖公與齊桓舉義兵北當戎與狄南艾荆及羣舒
按僖公即位之元年齊桓二十七年也齊桓十七年伐

山戎遠在僖公未即位之前至僖公十年齊侯許男伐
戎魯又不與鄭氏之說既謬而詩所謂戎狄是膺者孟
子又曰周公方且膺之如孟子之說豈僖公事也荆楚
也僖公之元年楚成王之十三年也是時楚方強盛非
魯所能制僖之四年從齊桓伐楚而齊以楚強不敢速
進乃次于陘而楚遂與齊盟于召陵此豈魯僖得以為
功哉六年楚伐許又從齊桓救許而力不能勝許男卒
面縛銜璧降于楚十五年楚伐徐又從齊桓救徐而力

又不能勝楚卒敗徐取其婁林之邑舒在僖公之世未嘗與魯通惟三年徐人取舒一見爾蓋舒為徐取之矣然則鄭氏謂僖公與齊桓南艾荆及羣舒者亦謬矣由是言之所謂戎狄是膺荆舒是懲者皆與春秋不合矣楚之伐徐取婁林齊人徐人伐英氏以報之蓋徐人之有楚伐也不求助于魯而求助于齊以報之以此見徐非魯之與國也則所謂遂荒徐宅者亦不見于春秋矣詩孔子所刪正也春秋孔子所修也詩之言不妄則春秋

疎謬矣春秋可信則詩妄作也其將奈何應之曰吾固言之矣雖其本有所不能達者猶將闕之是也惟闕其不知以俟焉可也

商頌解

古詩三百篇始終于周而仲尼兼以商頌豈多記而廣錄者哉聖人之意存一頌而有三益大商祖之德其益一也予紂之不憾其益二也明武王周公之心其益三也曷謂大商祖之德曰頌具矣曷謂予紂之不憾曰憫

廢矣曷謂明武王周公之心曰存商矣按周本紀稱武
王伐紂下車而封武庚于宋以為商後及武庚叛周公
又以微子繼之是聖人之意雖惡紂之暴而不忘湯之
德故始終不絕其為後焉或曰商頌之存豈異是乎曰
其然也而人莫之知矣非仲尼武王周公之心殆而成
湯之德微毒紂之惡有不得其著矣向所謂存一頌而
有三益焉者豈妄云哉

序問

或問詩之序卜商作乎衛宏作乎非二人之作則作者其誰乎應之曰書春秋皆有序而著其名氏故可知其作者詩之序不著其名氏安得而知之乎雖然非子夏之作則可以知也曰何以知之應之曰子夏親受學于孔子宜其得詩之大旨其言風雅有變正而論關雎鵲巢繫之周公召公使子夏而序詩不為此言也自聖人歿六經多失其傳一經之學分為數家不勝其異說也當漢之初詩之說分為齊魯韓三家晚而毛氏之詩始

出久之三家之學既廢而毛詩獨行以至于今不絕今齊魯之學沒不復見而韓詩遺說往往見于他書至其經文亦不同如逶迤郁夷之類是也然不見其終始亦莫知其是非自漢以來學者多矣其卒捨三家而從毛公者蓋以其源流所自得聖人之旨多歟今攷毛詩諸序與孟子說詩多合故吾於詩常以序為証也至其時有小失隨而正之惟周南召南失者類多吾固已論之矣學者可以察焉

時世論

二南小雅皆作于周
衰頌作于康王以後

按鄭氏譜周南召南言文王受命作邑於豐乃分歧邦
周邦周召之邑為周公旦召公奭之采地使施先公太
王王季之教于已所職六州之國其民被二公之德教
尤純至武王滅紂巡守天下陳其詩以屬太師分而國
之其得聖人之化者繫之周公謂之周南其得賢人之
化者繫之召公謂之召南今考之於詩義皆不合而其
為說者又自相牴牾所謂被二公之德教者是周公旦

召公奭所施太王王季之德教爾今周召之詩二十五篇關雎葛覃卷耳樛木螽斯桃夭兔罝采芣皆后妃之事鵲巢采芣小星皆夫人之事夫人乃太姒也麟趾騶虞皆后妃夫人之德化之應草蟲采蘋殷其雷皆大夫妻之事漢廣汝墳羔羊標有梅江有汜野有死麕皆言文王之化蓋此二十二篇之詩皆述文王太姒之事其餘三篇甘棠行露言召伯聽訟何彼穠矣乃武王時之詩烏有所謂二公所施先公之德教哉此以譜攷詩義

皆不能合者也譜言得聖人之化者謂周公也得賢人之化者謂召公也謂旦奭共行先公之德教而其所施自有優劣故以聖賢別之爾今詩所述既非先公之德教而二南皆是文王太姒之事無所優劣不可分其聖賢所謂文王太姒之事其德教自家刑國皆其夫婦身自行之以化其下久而變紂之惡俗成周之王道而著於歌頌爾蓋譜謂先公之德教者周召二公未嘗有所施而二南所載文王太姒之化二公亦又不得而與然

則鄭譜之說左右皆不能合也後之為鄭學者又謂譜言聖人之化者為文王賢人之化者為太王王季然譜本謂二公行先公之教初不及文王則為鄭學者又自相抵牾矣今詩之序曰關雎麟趾之化王者之風故繫之周公鵲巢騶虞之德諸侯之風故繫之召公至于關雎鵲巢所述一太姒耳何以為后妃何以為夫人二南之事一文王爾何以為王者何以為諸侯則序皆不通也又不言作詩之時世蓋自孔子歿羣弟子散亡而六

經多失其旨詩以諷誦相傳五方異俗物名字訓往往不同故於六經之失詩尤甚詩三百餘篇所作非一人所作非一國先後非一時而世久失其傳故於詩之失時世尤甚周之德盛于文武其詩為風為雅為頌風有周南召南雅有大雅小雅其義類非一或當時所作或後世所述故於時世之失周詩尤甚自秦漢以來學者之說不同多矣不獨鄭氏之說也昔孔子嘗言關雎矣曰哀而不傷太史公又曰周道缺詩人本之衽席關雎

作而齊魯韓三家皆以為康王政衰之詩皆與鄭氏之說其意不類蓋常以哀傷為言由是言之謂關雎為周衰之作者近是矣周之為周也遠自上世積德累仁至于文王之盛征伐諸侯之不服者天下歸者三分有二其仁德所及下至昆蟲草木如靈臺行葦之所述蓋其功業盛大積累之勤其來遠矣其盛德被天下者非一事也太姒賢妃又有內助之功爾而言詩者過為稱述遂以關雎為王化之本以謂文王之興自太姒始故於

衆篇所述德化之盛皆云后妃之化所致至于天下太平麟趾與騶虞之瑞亦以為后妃功化之盛效故曰麟趾關雎之應騶虞鵲巢之應也何其過論歟夫王者之興豈專由女德惟其後世因婦人以致衰亂則宜思其初有婦德之助以興爾因其所以衰思其所以興此關雎之所以作也其思彼之辭甚美則哀此之意亦深其言緩其意遠孔子曰哀而不傷謂此也司馬遷之於學也雜博而無所擇然其去周秦未遠其為說必有老師

宿儒之所傳其曰周道缺而關雎作不知自何而得此
言也吾有取焉昔吳季札聞魯人之歌小雅也曰思而
不貳怨而不言其周德之衰乎猶有先王之遺民焉而
太史公亦曰仁義陵遲鹿鳴刺焉然則小雅者亦周衰
之作也周頌昊天有成命曰二后受之成王不敢康所
謂二后者文武也則成王者成王也猶文王之為文王
武王之為武王也然則昊天有成命當是康王以後之
詩而毛鄭之說以頌皆是成王時作遂以成王為成此

王功不敢康寧執競曰執競武王無競維烈不顯成康
上帝是皇自彼成康奄有四方所謂成康者成王康王
也猶文王武王謂之文武爾然則執競者當是昭王以
後之詩而毛以為成大功而安之鄭以為成安祖考之
道皆以為武王也據詩之文但云成康爾而毛鄭自出
其意各以增就其已說而意又不同使後世何所適從
哉噫嘻曰噫嘻成王者亦成王也而毛鄭亦皆以為武
王由信其已說以頌皆成王時作也詩所謂成王者成

王也成康者成王康王也豈不簡且直哉而毛鄭之說
豈不迂而曲也以爲成王康王則于詩文理易通如毛
鄭之說則文義不完而難通然學者捨簡而從迂捨直
而從曲捨易通而從難通或信焉而不知其非或疑焉
而不敢辨者以去詩時世遠茫昧而難明也余於周南
召南辯其不合而關雎之作取其近似者焉蓋其說合
於孔子之言也若雅也頌也則辯之而不敢必而有待
焉夫毛鄭之失患于自信其學而曲遂其說也若予又

將自信則是笑奔車之覆而疾驅以追之也然見其失不可不辯辯而不敢必使余之說得與毛鄭之說並立於世以待夫明者而擇焉可也

本末論

關雎鵲巢文王之詩也不繫之文王而下繫之周公召公召公自有詩則得列于本國周公亦自有詩則不得列於本國而上繫于豳豳太王之國也考其詩則周公之詩也周召周公召公之國也考其詩則文王之詩也

何彼穠矣武王之詩也不列於雅而寓于召南之風棠
棣周公之詩也不列于周南而寓于文王之雅衛之詩
一公之詩也或繫之邶或繫之鄘或繫之衛詩述在位
之君而風繫已亡之國晉之為晉久矣不得為晉而謂
之唐鄭去咸林而徙河南為鄭甚新而遂得為鄭自漢
以來其說多矣蓋詩之類例不一如此宜其說者之紛
然也問者曰然則其將奈何應之曰吾之于詩有幸有
不幸也不幸者遠出聖人之後不得質吾疑也幸者詩

之本義在爾詩之作也觸事感物文之以言美者美之
惡者刺之以發其揄揚怨憤于口道其哀樂喜怒於心
此詩人之意也古者國有采詩之官得而錄之以屬太
師播之于樂于是考其義類而別之以為風雅而比次
之以藏于有司而用之宗廟朝廷下至鄉人聚會此太
師之職也世久而失其傳亂其雅頌亡其次序又采者
積多而無所擇孔子生於周末方修禮樂之壞于是正其
雅頌刪其繁重列于六經著其善惡以為勸戒此聖人

之志也周道既衰學校廢而異端起及漢承秦焚書之後諸儒講說者整齊殘缺以為之義訓耻于不知而人各自為說至或遷就其事以曲成其已學其于聖人有得有失此經師之業也惟是詩人之意也太師之職也聖人之志也經師之業也今之學詩也不出于此四者而罕有得焉者何哉勞其心而不知其要逐其末而忘其本也何謂本末作此詩述此事善則美惡則刺所謂詩人之意者本也正其名別其類或繫于此或繫于

彼所謂太師之職者末也察其美刺知其善惡以為勸戒所謂聖人之志者本也求詩人之意達聖人之志者經師之本也講太師之職因其失傳而妄自為之說者經師之末也今夫學者得其本而通其末斯盡善矣得其本而不通其末闕其所疑可也雖其本有所不能達者猶將闕之況其末乎所謂周召邶鄘唐豳之風是可疑也考之諸儒之說既不能通欲從聖人而質焉又不可得然皆其末也若詩之所載事之善惡言之美刺所

謂詩人之意幸其具在也然頗為衆說汨之使其義不明今去其汨亂之說則本義粲然而出矣今夫學者知前事之善惡知詩人之美刺知聖人之勸戒是謂知學之本而得其要其學足矣又何求焉其末之可疑者闕其不知可也蓋詩人之作詩也固不謀于太師矣今夫學詩者求詩人之意而已太師之職有所不知何害乎學詩也若聖人之勸戒者詩人之美刺是也知詩人之意則得聖人之志也

十月之交解

小雅無厲王之詩著其惡之甚也而鄭氏自十月之交以下分其篇以為當刺厲王又妄指毛公為訓詁時移其篇目因引前後以為據其說有三一曰節刺師尹不平此不當譏皇父擅恣余謂非大亂之世者必不容二人之專不然李斯趙高不同生于秦也其二曰正月惡褒姒滅周此不當疾豔妻之說出于鄭氏非史傳所聞况褒姒之惡天下萬世皆同疾而共醜者二篇譏之殆

豈過哉其三曰幽王時司徒乃鄭桓公友此不當云番
維司徒予謂史記所載鄭桓公在幽王十八年方為司
徒爾豈止桓公哉是三說皆不合於經不可按法為鄭
氏者獨不能自信而欲指他人之非斯亦惑矣今考兩
無正以下三篇之詩又其亂說歸向皆無刺厲王之文
不知鄭氏之說何從而為據孟子曰說詩者不以文害
辭不以辭害志非如是其能通詩乎

詩解統序

五經之書世人號為難通者易與春秋夫豈然乎經皆聖人之言固無難易繫人之所得有淺深今攷于詩其難亦不讓二經然世人反不難而易之用是通者亦罕使其存心一則人人皆能明而經無不通矣大抵謂詩為不足通者有三曰章句之詩也曰淫褻之辭也曰猥細之記也若然孔子為泛儒矣非唯今人易而不習考乎先儒亦無幾人是果不足通歟唐韓文公最為知道之篤者然亦不過議其序之是否豈足明聖人本意乎

易書禮樂春秋道所存也詩關此五者而明聖人之用
焉迹其道不知其用之與奪猶不辨其物之曲直而欲
制其方圓是果于其成乎故二南牽于聖賢國風惑于
先後幽居變風之末惑者溺于私見而謂之兼上下二
雅混于小大而不明三頌昧于商魯而無辯此一經大
槩之體皆所未正者先儒既無所取舍後人因不得其
詳由是難易之說興焉毛鄭二學其說熾辭辯固已廣
博然不合于經者亦不為少或失于疎畧或失于謬妄

蓋詩載關雎上兼商世下及武成平桓之間君臣得失風俗善惡之事廣闊遼邈有不失者鮮矣是亦可疑也余欲志鄭學之妄益毛氏之疎畧而不至者合之于經故先明其統要十篇庶不為之蕪泥云爾

二南為正風

天子諸侯當大治之世不得有風風之生天下無王矣故曰諸侯無正風然則周召可為正乎曰可與不可非聖人不能斷其疑當文王與紂之時可疑也可疑之際

天下雖惡紂而主文王然文王不得全有天下爾亦曰服事於紂焉則二南之詩作於事紂之時號令征伐不止於受命之後爾豈所謂周室衰而關雎始作乎史氏之失也推而別之二十五篇之詩在商不得為正在周不得為變焉上無明天子號令由已出其可謂之正乎二南起王業文王正天下其可謂之變乎此不得不疑而輕其與奪也學詩者多推於周而不辨於商故正變不分焉以治亂本之二南之詩在商為變而在周為正

乎或曰未諭曰推治亂而迹之當不誣矣

周召分聖賢解

聖人之治無異也一也統天下而言之有異焉者非聖人之治然矣由其民之所得有淺深焉文王之化出乎其心施乎其民豈異乎然孔子以周召為別者蓋上下不得兼而民之所化有淺深爾文王之心則一也無異也而說者以為由周召聖賢之異而分之何哉大抵周南之民得之者深故因周公之治而繫之豈謂周公能

行聖人之化乎召南之民得之者淺故因召公之治而
繫之豈謂召公能行賢人之化乎殆不然矣或曰不繫
於雅頌何也曰謂其本諸侯之詩也又曰不統於變風
何也曰謂其周迹之始也列於雅頌則終始之道混矣
雜于變風則文王之跡殆矣雅頌焉不可混周跡之始
其將畧而不具乎

論歐詩解

通考

晁氏曰歐公解詩毛鄭之說已善者固為之不改至於

質諸先聖則悖理考於人情則不可行然後易之故所得比諸儒最多但平日不信符命嘗著書以周易河圖洛書為妖妄今又以生民玄鳥之詩為怪說蘇子瞻曰帝王之興其受命之符卓然見于詩書者多矣河圖洛書玄鳥生民之詩豈可謂誣也哉恨學者推之太詳流入讖緯而後之君子亦矯枉過正舉從而廢之以為王莽公孫述之流緣此作亂使漢不失德莽述何自起而歸罪三代受命之符亦過矣

二南辯

鄭樵 後同

二南六州漢志扶風縣東北有周城西南有名城二南之詩得于周南係之周南得于召南係之召南本于所得之地而係之爾蓋歌則從二南之聲二南皆出於文

王之化言王者之化自北而南

東北一區尚染紂惡惟西南皆從文王之化

周召二公未嘗與其間二南之詩後世取以為樂章用之為燕樂為鄉樂為射樂為房中之樂所以彰文王之德美也故曰大武始于北出再成而滅商三成而南南

之為義蓋如是也五成而分周公左召公右周召南之

為義蓋如是也周世未有樂名南者惟鐘鼓之詩曰以

雅以南

陸希聲劉炫釋鐘鼓亦類雅南之南為二南微出已意曰南如周南之南

以箏不替

左氏載季札觀樂為有象舞箏南舞箏者

杜預釋左氏亦知南箏為

文王之樂不敢正指為南箏者

詳而考之南箏二南之箏也雅也象舞

頌之維清也箏之舞象箏之奏南其在當時見古樂如

此而文王世子又有所謂胥鼓南

鄭注謂南夷之樂豈有教世子而用夷樂

則南之為樂古矣二南之詩雖大槩美詩亦有刺詩不

徒西周之時而東周亦然與十三國風無異也若以為周衰之詩此齊魯韓之學也而周之盛時無一篇可取所謂盡周衰之文耳此三家之學不如毛氏之密也

關雎辯

齊魯韓三家皆以關雎為康王政衰之詩揚雄曰周康之時關雎作于上楊賜曰康王宴起關雎見幾而作太史公曰周道缺詩人本之衽席而關雎作范曄有曰康后晚朝關雎作諷薛君章句亦謂關雎詠淑女以刺時

詳諸上文皆謂作于周衰之文而不知麟趾乃關雎之應也序亦言衰世之公子季札觀歌小雅曰其周德之衰乎太史公曰仁義凌遲鹿鳴刺焉如此則麟趾小雅鹿鳴諸詩皆非治世音無疑矣曰非也蓋詩者樂也古人以聲詩奏之樂後世有不能法祖怠于政者則取是詩而奏之以申警諷故曰作作之為義如始作翕如之作非謂其詩始作于衰世也孔子言詩皆取詩之聲不會說詩之義如何如曰關雎樂而不淫哀而不傷

夫子喜魯

太師之樂音節中度故曰樂矣而不及於淫哀矣而不
及於傷皆從樂奏中言之非以序別其關雎之文義
又曰師摯之始關雎之亂皆樂之聲也非謂關雎之義
如此序詩者取以為關雎之義則非矣大抵古人學詩
最要理會詩之聲夫子曰人而不為周南召南其猶正
牆面而立為之為義亦作之意既為之作則翕純嘏繹
有聲有器非但歌詠而為周南召南之為正如三年不
為樂不圖為樂之至於斯之為謂之為謂之作者皆樂
之聲也

國風辯

詩者聲詩也出於情性古者三百篇之詩皆可歌歌則各從其國之聲周召王豳之詩同出於周而分為四國之聲邶鄘衛之詩同出于衛而分為三國之聲蓋採詩之時得之周南者繫之周南得之召南者繫之召南得之王城與豳者繫之王城與豳得之邶鄘衛者繫之邶鄘衛蓋歌則各從其國之聲何彼穠矣之詩何以不列於王風蓋為詩之時則東周也採詩之地則召南也故

列之召南黍離之詩何以不列之於二南蓋周大夫行役至於宗周之地閔其壞而思其舊其詩雖作於西周其人則東周也故列之王風平王何以不曰雅以其地則東周也幽厲何以不曰風以其地則成周也如此則木瓜雖美齊而在衛猗嗟雖刺魯而在齊泉水載馳等詩皆衛詩而在邶鄘召穆之民勞衛武之賓之初筵不附其國而在二雅皆以聲別也夫風之詩出於土風而雅之詩則出於朝廷大夫爾文王之詩見於風者二南

是也成王之詩見於風者豳風是也平王之詩見於風者王風是也雅頌之音與天下同列國之音隨風土而異若謂降黍離而為國風則豳詩亦可降耶大抵詩有三百皆以聲別古人採詩之時隨其國而係之聖人無容心於其間也至於稱其國之名號亦然如三監之地自康叔得國已統於衛今其詩之在頌襄武者亦分而為三不專曰衛唐叔封唐在燮父時已為晉矣至春秋時實有其詩今其目乃為唐也七月以後多為周公

作刺朝廷之不知今其詩乃皆為邶

邶大夫為之

在盤庚時

商已為殷故頌有殷武今其頌乃皆為商得于其地係於其國云耳聖人何容心哉嘗觀夫子之論詩曰吾自衛反魯然後樂正雅頌各得其所夫謂雅頌各得其所可也而謂樂正者何哉蓋樂者鄉樂也鄉樂即風詩也十五國風之中惟邶鄘衛其國相近其聲相似不比周召王豳猶有隔絕也夫子平時見魯太師所傳三國之聲時有異同及其環轍之時見衛人所歌之聲從而正

金文四庫
卷八
之故鄉樂曰正而雅頌但曰得所其意如此所以詩有
十五此國風之別也

風有正變辯

風有正變仲尼未嘗言而他經不載焉獨出于詩序皆
以美者為正刺者為變則邶鄘衛之詩謂之變風可也
緇衣之美武公駟鐵小戎之美襄公亦可謂之變乎必
不得已從先儒正變之說則當如穀梁之書所謂變之
正也穀梁之春秋書築王姬之館于外書春秋盟於首

戴皆曰變之正也蓋言事雖變常而終合乎正也河廣之詩曰誰謂河廣一葦航之其欲往之心如是其銳也然有舍之而不往者大車之詩曰穀則異室死則同穴其男女之情如是其至也然有畏之而不敢者氓之詩曰以爾車來以我賄遷其淫佚之行如是其醜也然有反之而自悔者此所謂變之正也序謂變風出乎情性止乎禮義此言得之然詩之必存變風何也見夫王澤雖衰人猶能以禮義自防也見中人之性能以禮義自

閑雖有時而不善終蹈乎善也見其用心之謬行己之乖倘返而為善則聖人亦錄之而不棄也先儒所謂風之正變如是而已

雅非有正變辯

二雅之作皆紀朝廷之事無有區別而所謂大小者序者曰政有大小故謂之大雅小雅然則小雅以蓼蕭為澤及四海以湛露為諸侯以六月采芑為北伐南征皆謂政之小者如此不知常武之征伐何以大于六月卷

阿之求賢何以大於鹿鳴乎或者又曰小雅猶言其詩
典正未至渾厚大醇者也此言猶未是蓋小雅大雅者
特隨其音而寫之律耳律有小呂大呂則歌大雅小雅
宜其有別也春秋襄公二十九年吳季札觀周樂歌大
雅小雅是雅有大小已見於夫子未刪之前無可疑然
無所謂正變者正變之言不出於夫子而出於序未可
信也小雅節南山之刺大雅民勞之刺謂之變雅可也
鴻雁庭燎之美宣王崧高烝民之美宣王亦可謂之變

乎蓋謂詩之次第皆以後先為序文武成康其詩最在前故二雅首之厲王繼成王之後宣王繼厲王之後幽王繼宣王之後故二雅皆順其序國風亦然則無有正變之說斷斷乎不可易也詩之風雅頌亦然詩之六義未嘗有先後之別

豳風辯

周召邶鄘衛王鄭洛邑齊豳秦魏唐陳檜曹此夫子未刪之前季札觀周樂國風之次第也周召邶鄘衛王鄭

齊魏唐陳秦檜曹豳此今詩國風之次第十五國風初無
增損或謂夫子離衛降王進鄭退齊入魏與秦以一己
之私揣摩聖人之意無是理也然聖人必以豳之風置
之檜曹之下者何也蓋習亂者必思治傷今者必思古
檜終于匪風思周道也曹終于下泉思治也天下後世
苟有下泉之思治匪風之思周道則陳淫檜亂之治一
變而復見豳風之正聖人序詩所以寓其變於十五國
風之末者此也邠風邠雅邠頌聖人以邠詩列于風雅

之間謂其不純風而可以雅駸駸乎移風而即于雅也
所以繫風之末居雅之前者此也或謂七月鵲鳴之詩
其言則雅其體則風雖非婦人女子之言實婦人女子
之體也故列之風雅頌之間聖人有深意也

齊魯韓三家之詩皆

無七月一篇或謂邠風七篇自鵲鳴以下六篇皆非邠事
獨七月一篇豈足以當一國之事周禮有邠雅頌豈不
為有邠詩而今亡之乎故齊魯韓三家之詩皆無七月
篇然則邠詩有亡者不可得而知之也周召王邠之風
同出于周而分于西

風雅頌辯

風雅頌詩之體也賦興比詩之言也六義之序一曰風
五曰雅六曰頌其後先次第聖人初無加損也三者之
體正如今人作詩有律有古有歌行是也風者出於土
風大槩小夫賤隸婦人女子之言其意雖遠其言淺近
重複故謂之風雅出于朝廷士大夫其言純厚典則其
體抑揚頓挫非復小夫賤隸婦人女子能道者故曰雅
頌者初無諷誦惟以鋪張勲德而已其辭嚴其聲有節
不敢瑣語褻言以示有所尊故曰頌唐之平淮夷頌漢

之聖主得賢臣頌效其體也然所謂風雅頌者不必自
關雎以下方謂之風不必自鹿鳴以下方謂之小雅不
必自文王以下方謂之大雅不必自清廟以下方謂之
頌程氏曰詩之六體隨篇求之有兼備者有偏得其三
者風之為言有諷諭之意三百篇之中如文王曰咨咨
女殷商之類皆可謂之風雅者正言其事三百篇之中
如憂心悄悄愠于羣小覲閔既多受侮不少之類皆可
謂之雅頌者稱美之辭如吁嗟麟兮吁嗟乎騶虞之類

皆可謂之頌故不必泥風雅頌之名以求其義也亦猶賦詩而備比興之義焉

頌辯

陳休齋云頌者序其事美其形容以告於神明是其詩專用於郊廟蓋鬼神之事戰國以下失之矣管仲有國頌屈原有橘頌秦人刻石頌功德漢有聖主得賢臣頌唐有磨崖中興頌以鬼神之事加之生人其弊如此余謂此說不然蓋頌者美其君之功德而已何以告神明

乎既以敬之為戒成王小毖為求助與夫振鷺臣工閔予小子皆非告神明而作也不惟天子用之諸侯之臣予祝頌其君者亦得用故僖公亦有頌後世揚雄之頌充國陸機之頌漢功臣韓愈之頌伯夷鄭頌子產之不毀鄉校蓋有是焉禮記載美哉輪焉美哉奐焉君子稱其善頌善禱亦猶是也憑詩序之言而疑後世作頌之過非的論也

商魯頌辯

魯頌是僖公已歿之後序中明言季孫行父請命于周而史克作頌是頌有四篇皆史克作明矣閼宮曰新廟奕奕奚斯所作蓋奚斯作新廟耳非作頌也而漢班固

西都賦序其誤自孟堅始

王延壽等

靈光殿賦云奚斯頌僖歌其路寢

反謂魯頌是

奚斯所作商頌明言正考父得商頌十二篇於周之太師而太史公曰宋襄修行仁義其大夫正考父美之而作商頌此蓋出於韓詩以商頌出於春秋之世故為此說爾當漢之時詩之序未出宜乎言詩者之牴牾也二

頌之作當以序為正

逸詩辯

詩有笙奏
金奏絲奏

狸首禮記射禮諸侯以狸首為節其下文云曾孫侯氏
四正具舉大夫君子凡以庶士小大莫處御于君所
以燕以射則燕則譽鄭氏以為狸首之詩騶虞狸首
采繁采蘋古之樂節也日用之間不可缺今狸首亡
逸詩自逸非夫子逸之也觀狸首詩可見矣

驪駒前漢王式傳曰客歌驪駒注以為逸詩今大戴禮

記客去

祈招昭十二年楚靈王好遊畋之樂子革托於祭公謀父作祈招之詩以正王心其詩曰祈招之愔愔式昭德音思我王度式如玉式如金形民之力而無醉飽之心

麥秀史記箕子過故殷墟而傷之作麥秀漸漸兮禾黍油油兮彼狡童兮不與我好兮

河水僖二十三年晉文公在秦秦伯享之公賦河水杜

注以為逸詩義取河水朝宗于海則春秋之世其詩猶存今無之矣

新宮燕禮升歌鹿鳴下管新宮商份曰管與笙類也皆有聲而已故新宮詩亦亡昭二十五年宋公子享昭子賦新宮謂之賦則有辭矣後漢明帝亦取焉必見其辭故得以播之歌詠蓋未有有詩而無詞者周禮祈年餼幽雅於管籥之類必得有辭

采薺

皆

古之人君行以肆夏步以采薺漢制宗廟樂入

廟門奏永至以為行步之節猶古采薺肆夏也

肆夏左傳金奏肆夏之三三謂三章國語云一名樊君
出入奏

王夏王出入奏王夏亦金奏

三夏國語云樊遏渠謂之三宮蓋擊鐘而奏此三曲惟
金奏故詩亦亡

九夏周禮鐘師之職奏九夏

王夏王出入奏肆夏尸出入奏亦名樊昭夏牲出入奏

一名遏納夏一名渠章夏齊夏族夏祓夏鷺夏皆金奏鄭
康成謂九夏皆詩篇名頌之類今亡是以頌不能具
馬

諸儒逸詩辯

論語云素以為絢兮唐棣之華偏其反而豈不爾思室
是遠而舉碩人之詩而素以為絢兮之句不存閱唐棣
之詩而偏其反而之語不載則詩之章句逸者多矣如
韓詩雨其無極傷我稼穡今亦不見于詩而無正篇無

其辭齊魯韓詩並無七月篇

亡詩六篇

魚麗之後亡其三南陔白華華黍也南山有臺南有嘉魚之後亡其三由庚崇丘由儀也六篇之詩同在一處不應中間南有嘉魚南山有臺二詩獨能存也按儀禮鄉飲酒及燕禮笙入于縣中奏南陔白華華黍又曰間歌魚麗笙由庚歌南有嘉魚笙崇丘歌南山有臺笙由儀此六詩皆主於笙奏之商份曰所謂亡其辭者今論

語亡字皆讀為無字謂此六詩於笙奏之雖有其聲舉
無辭句不若魚麗南有嘉魚南山有臺於歌奏之歌人
聲也故有辭爾此歌與笙之異也 辯曰古者有堂下
堂上之樂歌主人聲堂上樂也笙鏞以間堂下樂也謂
之笙鏞乃間歌之聲皆有義而無其辭束皙微之補亡
六詩皮日休補肆夏不知六亡詩乃笙詩肆夏乃金奏
初無辭之可傳也

樂章圖

歌詩鄉飲酒燕饗皆用之魚麗

間

南有嘉魚

間

南山有

臺

間

此三詩鄉飲酒燕禮用之歌鹿鳴燕禮升歌鹿

鳴皇皇者華燕饗用之四牡以上六詩皆小雅

合樂詩

關雎

葛覃

卷耳

鵲巢

采蘋

以上皆二南合為樂詩夫子所謂人而不為周南召
南者以此

射樂即樂節古者諸侯之射也必先行燕禮卿大夫射

必先行鄉飲酒禮騶虞

王

狸首

侯

采蘋

大

采繁

士

周

禮樂師凡射王以騶虞為節諸侯以貍首為節大夫以采蘋士以采芣為節今召南詩中有采芣采蘋騶

虞三詩而貍首獨亡

以上三詩皆召南

笙詩鄉飲酒燕射用之又云升歌三終笙入三終間歌

三終合樂三終

南陔

笙由庚

間笙

崇丘

間笙

由儀

間笙

皆小雅逸詩為六笙歌

管奏管與笙一類皆竹吹之獨燕禮升歌取鹿鳴下管新宮自春秋至後漢猶存今亡注見逸詩

金奏肆夏 三夏 王夏 九夏皆金奏即頌詩之類

見逸詩

絲奏三百篇中之詩皆可被之絃歌故琴中有鵲巢操
騶虞伐檀操白駒操皆今詩文又古人謂之雅琴頌
琴古之雅頌即今之琴操琴古禁也將以禁人之邪
心故以歌乎詩如文中子歸而援琴鼓蕩蕩之什乃
知聲至隋末猶存

房中之樂二南詩用之為房中之樂周有房中樂漢有

房中詞樂唐山夫人作高祖樂用楚聲故房中樂楚聲也

兩君相見之樂文王大明繇辯曰春秋戰國以來諸侯卿大夫士賦詩道志者凡詩雅雜取無擇至考其入樂則自邶鄘至豳無一詩在數或曰周禮篇章吹豳詩豳雅豳頌則豳疑于入樂矣然聽吹雅頌而無豳風非今七月等語此歐陽文忠公疑其別有豳詩于今不存也

刪詩辯

司馬遷云古者詩三千餘篇夫子取其可施於禮義者三百篇孔穎達曰按書傳所引之詩見在者多亡逸者少則夫子所錄不容十分去九夫詩上自商頌祀成湯下至株林刺陳靈公上下千餘年而詩纔三百五篇有更十君而取一篇者皆商周人所作夫子併得之於魯太師編而錄之非有意於刪也夫翹翹車乘招我以弓豈不欲往畏我友朋如斯等語亦不悞也胡為而刪之

乎牆有茨桑中等語至俚又胡為而不刪之乎則知刪詩之說與春秋始隱終獲麟之事皆漢儒倡之也大抵得其鄉聲則存不得其聲則不存也周之列國如滕薛如許蔡如邾莒等國夫豈無詩但魯人不識其音則不得其詳季札聘魯魯人以雅頌之外所得十五國風盡歌之及觀今三百篇於季札所觀與魯人所存無加損也若夫夫子有意刪詩則當環轍之時必大搜而備索之奚止十五國乎然聖人不欲強備者何也蓋以天

下情性美刺諷詠亦不過是也刪之之說非夫子本意
漢儒孔安國倡之文中子極筆載之善乎邵康節詩曰
自從刪後更無詩康節之詩非謂夫子果刪詩也蓋謂
天下情性不出乎此求之三百篇之中足矣不必外有
所求也

詩序辯

序作於
衛宏

漢興四家之詩毛詩未有序惟韓詩以序傳於世齊詩
無序魯詩之序有無未可知詩之序大槩與今序異韓

詩得序而益明漢儒多宗之如司馬遷揚雄范曄之徒皆以二南作于周衰之時此韓學也毛詩至衛宏為之序鄭玄為之注而毛氏之學盛行又非韓所敢望也或

者謂大序

即關雎序

作于子夏

王肅鄭玄蕭統皆云

小序作于毛公此

說非也序有鄭註而無鄭箋其不作於子夏明矣毛公於詩第為之傳其不作序又明矣又謂大序作于聖人小序作於衛宏謂小序作于衛宏是也謂大序作于聖人非也命篇大序蓋出於當時採詩太史之所題而題

下之序則衛宏從謝曼卿受師說而為之也按後漢書
儒林傳云衛宏字敬仲從謝曼卿學毛詩因作毛詩序
善得風雅之旨于今傳于世蓋嘗謂詩之大序非一世
一人之所能為採詩之官本其得于何地審其出於何
人究其主於何事且有實狀然後致之太師上之國史
是以取發端之二字以命題故謂大序是當時採詩太
史之所題詩之小序序所作為之意其辭顯者其序簡
其辭隱者其序備其善惡之微者序必明著其迹而不

可以言殫者則亦闕其目而已故謂小序是宏誦師說而為之或者又曰序之之辭委曲明白非宏所能為曰使宏鑿空為之雖孔子亦不能使宏誦師說為之則雖宏有餘矣意者毛氏之詩歷代講師之說至宏而悉加詮次焉今觀宏之序有專取諸書之文至數句者有雜取諸家之說而辭不堅決者有委曲宛轉附經以成其義者情動于中而形于言言之不足故嗟歎之其文全出於樂記成王未知周公之志公乃為詩以遺王其文

全出於金縢自微子至于戴公其間禮樂廢壞其文全出于國語古者長民衣服不貳從容有常以齊其民其文全出于公孫尼子則詩序之作實在於數書既傳之後明矣此所謂取諸書之文有至數句者此也關雎之序既曰風之始也所以風天下而正夫婦也意亦足矣又曰風風也風以動之上以風化下下以風刺上又曰一國之事係一人之本謂之風載馳之詩既曰許穆夫人閔其宗國顛覆而作又曰衛懿公為狄所滅綠衣之

詩既曰繹賓尸矣又曰靈星之尸也此蓋衆說並傳衛氏得其美辭美意并錄而不忍棄之此所謂雜諸家之說而辭不堅決者也騶虞之詩先言人倫既正朝廷既治天下純被文王之化而後繼之蒐田以時仁如騶虞則王道成行葦之詩先言國家忠厚仁及草木然後繼之以內睦九族外尊事黃耆養老乞言此所謂委曲宛轉附經以成其義者也宏序作於東漢故漢世文字未有引詩序者惟黃初四年有曹共公遠君子近小人之

語蓋魏後於漢而宏之序至是而始行也使其果知詩序出于衛宏則風雅正變之說二南分繫之說羔羊蟋蟀之說或鬱而不暢或巧而不合如蕩以蕩蕩上帝發語而曰天下蕩蕩無綱紀文章召旻以旻天疾威發語而曰閔天下無如召公之為臣雨無正乃大夫刺幽王也而曰衆多如雨非所以為正也牽合為文而取譏於世此不可不辯也

詩箋辯

張華博物志曰聖人制作謂之經賢者著述謂之傳

孔毛

左鄭氏註毛詩而曰箋不解此意孔穎達云箋表也識

也鄭氏以毛詩悉備遵暢厥旨所以表明毛意紀識其
事故特稱箋餘注無所遵奉故謂之注歐陽永叔深排
鄭學以為多喜改字永叔未深考耳漢時四詩並存文
字各有不同雖三家不如毛詩之密然不可謂無所長
也鄭氏箋詩傳意有不同者以已說易之經文有不安
者以三家易之證之他書則可知矣吉蠲為饔鄭氏以

蠲為主吉主為饕則韓詩之言也素衣朱褌鄭氏以褌
為綃素衣朱綃則齊詩之言也其耕澤澤鄭氏以澤為
釋其耕釋釋亦爾雅之言也舟人之子鄭氏以舟當作
周周人之子則朱育集字之言也艷妻扇方處鄭氏以
艷為閭閻妻扇方處則漢杜欽傳之言也當鄭氏箋詩
三家俱存故鄭氏雖解釋經文不明言改字之由亦以
學者既習詩則三家之詩不容不知也後世三家既亡
學者惟見其改字而不見詩學之所由異此鄭氏之所

以獲譏也則鄭於經不謂之注而謂之箋箋之為言魏
晉間所以致辭于皇太子諸王者也鄭嘗以君師之禮
待毛公而不擅改聖人之經明矣觀其注禮記玉藻雜
記顛倒不倫之處鄭雖理之使條貫亦不敢易其先後
姑於注下發明而已則其改字不出臆見愈可信矣古
詩云讀書不到康成處不敢高聲論聖賢吾于鄭氏詩
箋見之矣

讀詩法

詩三百篇皆可歌可誦可舞可弦太師世傳其業以教
國子自成童至既冠皆往習焉誦之則習其文歌之則
識其聲舞之則見其容弦之則寓其意春秋以下列國
君臣朝聘燕享賦詩見志微寓相諷鮮有不能答者以
詩之學素明也後之弦歌與舞者皆廢直誦其文而已
且不能言其義故論者多失詩之意夫文章之體有二
有史傳之文有歌咏之文史傳之文以實錄為主秋毫
之善不私假人歌咏之文揚其善而隱其惡大其美而

張其功後世欲求歌咏之文太過直以史視之則非矣
孝經十八章其及于詩者十中庸孟子所以善言詩者
以其無漢儒之說亂之也蓋嘗論之善觀詩者當推詩
外之意如孔子子思善論詩者當達詩中之理如子貢
子夏善學詩者當取一二言為立身之本如南容子路
善引詩者不必分別所作之人所採之詩如諸經所舉
之詩可也綿蠻黃鳥止于丘隅綿蠻不過喻小臣之擇
卿大夫有仁者依之夫子推而至於為人君止於仁與

國人交止於信鳶飛戾天魚躍于淵

旱麓

不過喻惡人

遠去而民之喜得其所子思推之上察乎天下察乎地

觀詩如此尚何疑乎如切如磋如琢如磨

淇澳

而子貢

能達之於貧富之間巧笑倩兮美目盼兮

碩人

而子夏

能悟于禮後之說論詩若此尚何疑乎南容三復不過

白圭

抑

子路終身所誦不過不忤不求

雄雉

學詩至此

奚以多為維岳降神生甫及申

崧高

宣王詩也夫子以

為文武之德夙夜匪懈以事一人仲山甫詩也左氏以

為孟明之功小宛幽之詩也祭父以為文王戎狄是膺

荆舒是懲僖公詩也孟子以為周公矢其文德洽此四

國

江漢

記禮者以為太王之事明明天子令聞不已

江

漢

記禮者以為三代之君引詩若此奚必分別所作之

人所採之詩乎達是詩然後可以言詩也不然周餘黎

民靡有孑遺信其為孑遺矣崧高維嶽峻極于天信其

為極矣必欲以實迹驗之則不可以言詩善乎孟子之

言詩可謂長于詩矣詩曰民之秉彝好是懿德孟子從

而釋之曰民之秉彜也故好是懿德而已未嘗費辭而理自明故橫渠有詩曰置心平易始知詩楊中立見之曰知此詩者可以讀三百篇矣信哉言乎

詩有美刺

詩有美刺美詩作于文武成康之世歌詠太平而不顯作者之名而况刺詩當王室衰微諸侯橫恣譏訶醜亂之跡暴揚帷幄之私則其隱晦姓名宜愈甚矣是以作詩者不明著其人亦不直指其事惟節南山刺幽王也

則曰家父作誦以究王凶巷伯寺人傷讒而作也則曰
寺人孟子作為此詩祈父詩曰祈父予王之爪牙烝民
詩曰吉甫作誦穆如清風如此則明著其所作之人其
他諸詩有美刺者不可以言語求必將觀其意可矣故
其譏刺是人也言其所為之惡而言其爵位之尊服
飾之美而民疾之以見其不堪也君子偕老副笄六珈
赫赫師尹民具爾瞻是也其頌美是也不言其所為
之善而言其冠佩之華容貌之盛而民安之以見其無

媿也緇衣之宜兮敝予又改為兮服其命服朱芾斯皇
是也後世惟孟子言齊王鼓樂田獵深識此意觀其言
曰百姓聞王鐘鼓管籥之音車馬羽毛之美其譏之則
曰舉疾首蹙額而相告曰吾王之好鼓樂田獵夫何使
我至於此極也其美之則曰舉欣欣然有喜色而相告
曰吾王庶幾無疾病歟何以能鼓樂田獵也正得此意
孟子長于詩故其言自與詩合

毛鄭之失

何彼穠矣之詩平王以後之詩也注以為武王之詩而謂平王為平正之王齊侯為齊一之侯按春秋莊公元年書王姬歸于齊乃桓王女平王孫下嫁於齊襄公故詩曰齊侯之子平王之孫斷無疑周頌作于康王成王之世故稱成王康王今毛鄭以頌皆成王時作不應得稱成王康王故此昊天有成命云成王不敢康為成此王功不自安逸執競之不顯成康謂成大功而安之噫嘻之成王謂成是王事惟以召南為文武之詩故不得

不以平王為平正之王惟以周頌為成王時作故不得
不以成王為成此王功也殊不知詩中此類甚多名南
中有康王以後之詩有平王以後之詩不特文武時也
甘棠行露之美召公既歿之後在康王世也何彼穠矣
作於平王以後亦猶是也不必謂武王詩大雅中大明
之維此文王思齊之文王之母皇矣之比于文王靈臺
之王在靈沼緜之文王蹶厥生皆後世詩人追詠之辭
何嘗作于文王之世周頌之美成王亦猶是也不必謂

成王時作毛鄭解經不能無失孰有大於此者故特舉
一二言之

詩亡然後春秋作

胡文定公曰邶鄘以下多春秋詩而謂詩亡然後春秋
作何也黍離降而為國風天子無復有雅而王者之詩
亡矣春秋始隱公適當詩亡之後謂詩亡者雅詩亡也
予謂不然春秋作於獲麟之時乃哀公十四年矣詩亡
於陳靈公乃孔子未生之前故曰詩亡然後春秋作謂

美刺之詩亡而褒貶之書作矣非有定義也

秦以詩廢而亡

陳君舉曰春秋之衰以禮廢秦之亡以詩廢嘗觀之詩
刑政之苛賦役之重天子諸侯朝廷之嚴而后妃夫婦
衽席之秘聖人爲詩而使天下匹夫匹婦之微皆得以
言其上宜若啓天下輕君之心然亟諫而不悟顯戮而
不戾相與携持去之而不忍是故湯武之興其民急而
不敢去周之衰其民哀而不敢離蓋其抑鬱之氣舒而

金史卷八
無聊之意不蓄也嗚呼詩不敢作天下怨極矣卒不能
勝共起而亡秦秦亡而後快於是始有匹夫匹婦存亡
天下之權嗚呼春秋之衰以禮廢秦之亡以詩廢吾固
知公卿大夫之禍速而小民之禍遲而大而詩者正所
以維持君臣之道其功用深矣

序草木類兼論詩聲

鄭樵

學者皆操窮理盡性之說而以虛無為宗至於實學則
置而不問當仲尼之時已有此患故曰小子何莫學夫

詩詩可以興可以觀可以羣可以怨邇之事父遠之事君多識於鳥獸草木之名其曰小子者無所識之辭也其曰何莫者苦口之辭也故又曰人而不為周南召南其猶正牆面而立此苦口之甚也一部論語言他書不過一再惟詩則言之又言凡十二度言焉門弟子有能學詩者則深嘉之子貢子夏在孔門未為高弟至于論詩則與之至于夏又發起予之歎者深嘉之也夫樂之本在詩詩之本在聲竊觀仲尼初亦不達聲至哀公十

一年自衛反魯質正于太師氏而後知之故曰吾自衛
反魯然後樂正雅頌各得其所此言詩為樂之本而雅
頌為聲之宗也其曰師摯之始關雎之亂洋洋乎盈耳
哉此言其聲之盛也又曰關雎樂而不淫哀而不傷此
言其聲之和也人之情聞歌則感樂者聞歌則感而為
淫哀者聞歌則感而為傷惟關雎之聲和而平樂者聞
之而樂其樂不至于淫哀者聞之而哀其哀不至于傷
此關雎所以為美也緣漢人立學官講詩專以義理相

傳是致衛宏序詩以樂為樂得淑女之樂淫為不淫其
色之淫哀為哀窈窕之哀傷為無傷善之傷如此說關
雎則洋洋盈耳之旨安在乎臣之序詩於風雅頌曰風
土之音曰風朝廷之音曰雅宗廟之音曰頌而不曰風
風者教也雅者正也言王政之所由廢興也頌者美盛
德之形容也於二南則曰周為河洛召為岐雍河洛之
南瀕江岐雍之南瀕漢江漢之間二南之地詩之所起
在於此屈宋以來騷人墨客多生江漢故仲尼以二南


之地為作詩之始而不曰南言化自北而南於王黍離
豳七月則曰王為王城東周之地豳為豳豐西周之地
七月者西周之風黍離者東周之風而不曰黍離降國
風臣之序詩專為聲歌欲以明仲尼之正樂臣之釋詩
深究鳥獸草木之名欲以明仲尼教小子之意然兩漢
之言詩者惟儒生論義不論聲而聲歌之妙猶傳于瞽
史經董卓赤眉之亂禮樂淪亡殆盡魏人得漢雅樂郎
僅能歌文王鹿鳴騶虞伐檀四篇而已太和之末又亡

其三惟有鹿鳴至晉又亡自鹿鳴亡後聲詩之道絕矣夫詩之本在聲而聲之本在興鳥獸草木乃發興之本漢儒之言詩者既不論聲又不知興故鳥獸草木之學廢矣若曰關關雎鳩在河之洲不識雎鳩則安知河洲之趣與關關之聲乎凡鴈鶩之類其喙褊者則其聲關關鷄雉之類其喙銳者則其聲嚶嚶此天籟也雎鳩之喙似鳬鴈故其聲如是又得水邊之趣也小雅曰呦呦鹿鳴食野之苹不識鹿則安知食苹之趣與呦呦之聲

乎凡牛羊之屬有角無齒者則其聲呦呦駝馬之屬有齒無角者則其聲蕭蕭此亦天籟也鹿之喙似牛羊故其聲如是又得萋蒿之趣也使不識鳥獸之情狀則安知詩人關關呦呦之興乎若曰有敦瓜苦蒸在栗薪者謂瓜苦引蔓於籬落間而有敦然之繫焉若曰桑之未落其葉沃若者謂桑葉最茂雖未落之時而有沃若之澤使不識草木之精神則安知詩人敦然沃若之興乎陸璣者江左之騷人也深為此患為毛詩作鳥獸草木

蟲魚疏然璣本無此學但加採訪其所傳者多是支離
自陸璣之後未有以此明詩者惟爾雅一種為名物之
宗然孫炎郭璞所得既希張揖孫憲所記徒廣大抵儒
生家多不識田野之物農圃人又不知詩書之旨二者
無由參合遂使鳥獸草木之學不傳惟本草一家人命
所係凡學之者務在識真不比他書只求說也神農本
經有三百六十以應周天之數陶弘景隱者也得此一
家之學故益以三百六十以應周天之數而兩之臣少

好讀書無涉世意又好泉石有慕弘景心結茅夾潞山中與田夫野老往來與夜鶴曉猿雜處不問飛潛動植皆欲究其情性於是取陶隱居之書復益以三百六十以應周天之數而三之已得鳥獸草木之真然後傳詩已得詩人之興然後釋爾雅今作昆蟲草木畧為之會同庶幾衰晚少備遺忘豈敢論實學也夫物之難明者為其名之難明也名之難明者謂五方之名既已不同而古今之言亦自差別是以此書尤詳其名焉



稗編卷八